

四庫全書

史部

欽定四庫全書

漢制攷卷三

宋 王應麟 撰

儀禮

士冠禮所卦者注所以畫地記爻 疏筮法依七八九  
六之爻而記之但古用木畫地今則用錢以三少為  
重錢重錢則九也三多為交錢交錢則六也兩多一  
少為單錢單錢則七也兩少一多為折錢折錢則八  
也案少牢云卦者在左坐卦以木故知古者畫卦以

木也

有司如主人服注有司羣吏有事者謂主人之吏所自  
辟除府史以下今時卒吏及假吏是也 疏周禮三  
百六十官之下皆有府史胥徒不得君命主人自辟  
除去役賦補置之周禮皆云府史此云羣吏吏史亦  
一也故舉漢法為證

抽上鞞注鞞藏筴之器今時藏弓矢者謂之鞞丸也

疏此舉漢法為況亦欲見鞞弓矢者以皮為之故詩

云象弭魚服是以魚皮為矢服則此鞮亦用皮也

設洗直于東紫注洗承盥洗者棄水器也士用鐵紫屋翼也周制自卿大夫以下其室為夏屋水器尊卑皆用金壘及大小異 疏士用鐵者案漢禮器制度洗之所用士用鐵大夫用銅諸侯用白銀天子用黃金也檀弓孔子云見若覆夏屋者矣鄭注云夏屋今之門廡漢時門廡也兩下為之故舉漢法以況夏屋兩下為之或名兩下屋為夏屋夏后氏之屋亦為夏屋

鄭云卿大夫以下其室為夏屋兩下而周之天子諸侯皆四注金壘此亦案漢禮器制度尊卑皆用金壘及其大小異榮即今之搏風云榮者與屋為榮飾言翼者與屋為翅翼

韎韐注今齊人名菑為韎韐

緇布冠缺項青組纓屬于缺緇纒廣終幅長六尺皮弁笄爵弁笄注缺讀如頰緇布冠無笄者著頰圍髮際結項中隅為四綴以固冠也今未冠笄者著卷幘頰

象之所生也。滕薛名國為頰，纏今之幘，梁也。笄，今之簪。疏著頰圍髮際者無正文，約漢時卷幘亦圍髮際，故知也。頰，象之所生者，此舉漢法以況義。漢時男女未冠笄者，首著卷幘之狀，亦以布帛之等圍繞髮際，為之。漢時滕薛二國云國，齒卷幘之類，亦遺象，故為況也。幘，梁亦舉漢法為況。幘，梁之狀，鄭目驗而知。至今久遠亦未審也。

有篚注篚竹器如笄者。疏舉漢法為況也。

緇布冠各一匱注緇布冠今小吏冠其遺象也匱竹器  
名今之冠箱也 疏緇布冠士為初加之冠冠訖則  
弊之不用庶人則常著之故詩云臺笠緇撮是庶人  
以布冠常服者以漢之小吏亦常服之故舉為況冠  
箱亦舉漢法為況

屨青絢注絢之言拘也以為行戒狀如刀衣鼻在屨頭  
疏此以漢法言之今之屨頭見有下鼻似刀衣鼻  
故以為況也

大古冠布注白布冠者今之喪冠是也

周弁殷冔夏收注其制之異亦未聞 疏案漢禮器制

度弁冕周禮弁師相參周之冕以木為體廣八寸長

尺六寸績麻三十升布為之上以玄下以纁前後有

旒尊卑各有差等天子玉笄朱紘其制可聞云未聞

者但夏殷之禮亡其制與周同異亦如上未聞也

士昏禮女次注次首飾也今時髮也

姆注若今時乳母矣 疏漢時乳母則選德行有乳者

為之并使教子

纚笄注纚縮髮笄今時簪也 疏簪舉漢為況義

被穎黼注卿大夫之妻刺黼以為領如今偃領矣 疏  
舉漢法鄭君目驗而知至今已遠偃領之制亦無可  
知也

爾雅黼領謂之裸注繡刺黼文以襪領

婦執笄注竹器而衣者其形蓋如今之筓筥簾矣 疏  
此舉漢法以況義但去今以遠其狀無以可知也

鄉飲酒禮注今郡國十月行此飲酒禮 疏漢時已罷

諸侯之國而為郡郡有太守而封王子母弟者仍為國故云郡國也

鄉朝服注今郡國行鄉飲酒之禮玄冠而衣皮弁服與禮異

鄉射禮注今郡國行此禮以季春 疏漢時雖無諸侯國而置郡為守其王之子弟猶名國其君曰相故鄭注禮記云如今從太守相臨之禮是也引之者證時

節與周異也

主人朝服注今郡國行此鄉射禮皮弁服與禮為異  
疏引之者欲見與周異也

不及地武注武迹也中人之迹尺二寸 疏無正文蓋  
目驗當時而言漢禮云五武成步步六尺或據此而  
言也

中十尺注方者也用布五丈今官布幅廣二尺二寸旁  
削一寸 疏此言十尺用布五幅幅廣二尺二寸兩

畔各削一寸為縫幅各二尺在故五幅為一丈也漢法幅二尺二寸亦古制存焉故舉以為況周禮鄭志純三只只八寸二尺四寸者據繒幅也

燕禮設洗當東雷注當東雷者人君為殿屋也亦南北以堂深 疏漢時殿屋四向流水故舉漢以況周言東雷明亦有西雷對大夫士言東榮兩下屋故也

坐行之注若今坐相勸酒

大射儀同

燕朝服於寢注今辟雍十月行此燕禮玄冠而衣皮弁

服與禮異也 疏引漢法欲見與古異者周時玄冠服則緇布衣今衣皮弁服是其異也

大射儀有豐注近似豆大而卑矣 疏既用豆為形還近似籩豆之豆舉漢法而知

司射適次注次若今時更衣處張幃席為之

聘禮釋幣於行注今時民春秋祭祀有行神古之遺禮乎 疏鄭以行神無正文雖約檀弓猶引漢法為況東帛注帛今之璧色繒也 疏周禮大宗伯孤執皮帛

鄭注亦然東帛亦與璧色同以其相配但未知正用何色耳

及郊注遠郊百里近郊各半之 疏尚書君陳序云命君陳分正東郊成周鄭注周之近郊五十里今河南洛陽相去則然鄭以目驗知之

以二竹篋方玄被纁裏有蓋注竹篋方者器名也以竹為之狀如篋而方如今寒具管管者園此方耳 疏寒具若籩人先鄭云朝事謂清朝未食先進寒具口

實之籩實以冬食故謂之寒具宮園此方者方圓不同為異也

束紡注紡紡絲為之今之縛也 疏鄭注周禮內司服

云素紗者今之白縛也則此束紡者素紗也故據漢

法況之

縛息絹反聲類  
以為今正絹字

百名以上書於策不及百名書於方注名書文也今謂之字 疏鄭注論語亦云古者曰名今世曰字許氏說文亦然名者即今之文字也

圭與纁皆九寸注雜采曰纁以韋衣木板飾以三色再就 疏依漢禮器制度而知也但木板大小一如玉制然後以韋衣之大小一如其板

卿大夫訝注訝主國君所使接待賓者如今使者護客十六斗曰藪注今江淮之間量名有為藪者

今文藪為逾

論語注十六斗曰庾正義庾逾藪其數同

四秉曰筥注筥穢名也若今菜易之間刈稻聚把有名為筥者

公食大夫禮漿飲注載漿也 疏載之言載以其汁滓  
相載故云載漢法有此名故也

腳腫曉注今時臃也

覲禮斧依注依如今緋素屏風也有繡斧文所以示威  
也斧謂之黼 疏案爾雅牖戶之間謂之扆以屏風  
為斧文置於依地孔安國顧命傳云扆屏風畫為斧  
文置戶牖間是也言緋素者緋赤也素白也漢時屏  
風以緋素為之象古者白黑斧文故鄭以漢法為況

喪服冠六升注布八十縷為升升字當為登登成也今之禮皆以登為升俗誤已行久矣

總衰裳注凡布細而疏者謂之總今南陽有鄧總 疏謂漢時南陽郡鄧氏造布有名總

櫛笄注櫛笄者以櫛之木為笄或曰榛笄有首者若今時刻鏤摘頭矣 疏摘頭之物刻鏤為之此笄亦在頭而云首為大飾明首亦刻鏤之故舉漢法況之也 髻注髻露紒也以麻者自項而前交於額上卻繞紒如

著幘頭焉 疏鄭引漢法幘頭況者古之括髮其髻之狀亦如此

繩菲注今時不借也 疏周時人謂之屨于夏時人謂之菲漢時謂之不借

士喪禮浴衣於篋注浴衣已浴所衣之衣以布為之其制如今通裁 疏布單衣漢時名為通裁故舉漢法為况

渙濯注古文渙作淥荆沔之間語 疏豫州人語

連約注約屨飾如刀衣鼻在屨頭上以餘組連之 疏  
以漢時刀衣鼻況約在屨頭上以其皆有孔得穿繫  
于中而過若無約則謂之鞮屨

貝三注貝水物古者以為貨江水出焉 疏漢書食貨  
志云五貝為朋又有大貝牡貝之等以為貨用

免于房注免之制未聞舊說以為如冠狀廣一寸此用  
麻布為之狀如今之著慘頭矣

後漢向栩好被髮著絳綃頭注綃當作幪

髻于室注既去纚而以髮為大紒如今婦人露紒其象也其用麻布亦如慘頭然

葵菹芋注齊人或名全菹為芋 疏菹法舊短四寸者全之若長於四寸者亦切之

敦注敦有足則敦之形如今酒敦

既夕禮薦車注薦進也進車者象生時將行陳駕也今時謂之魂車 疏鄭舉漢法況之以其神靈在焉

用軸注軸軼軸也軸狀如轉麟 疏此以漢法況之漢

時名轉軸為轉轡

薦馬纓注纓今馬鞅也

疏古者謂之纓漢時謂之

故舉漢法為況也

池注池者象宮室之承雷以竹為之狀如小車筭衣以

青布 疏此鄭依漢禮而言

喪大記注同 疏鄭以漢之制度而知小車之

箱必猶狹長

齊注齊居柳之中央若今小車蓋上韃也 疏漢時小

車蓋上有韃在蓋之中央故舉以為說

旬人抗重注今時有死者鑿木置食其中樹於道側由  
此

脾析注脾讀為雞脾毗之脾 疏時俗有此語故讀從  
之也

中帶注若今之禪襪

隸人注罪人也今之徒役作者也

於注今之輦也

不饋于下室注下室如今之內堂正寢聽朝事 疏下

室既為燕寢故鄭舉漢法內堂況之

士虞禮墮祭注齊魯之間謂祭為墮 疏齊南魯北謂

祭為墮者由墮下而祭因即謂祭為墮

三个注今俗或名枚曰個音相近

特牲禮注个猶枚也今俗言物數若云若

千個者此讀然

乾肉注如今涼州烏翅矣 疏漢時乾脯似之故鄭以

今曉古也

主婦亦拜賓注拜之於闈門之內闈門如今東西掖門

疏案爾雅釋宮云宮中之門謂之闈則闈門在宮  
內漢時宮中掖門在東西若人左右掖故舉以為況  
也

鈎袒注如今擻衣也

釋文作擻  
衣音宣

疏若漢時人擻衣以

露臂

特牲饋食禮於在其南注於之制如今大木舉矣上有  
四周下無足 疏鄭舉漢法以曉古

棘心七刻注刻若今龍頭

有司徹注桃謂之軟讀如或春或枕之枕字或作桃者  
秦人語也此二匕者皆有淺升狀如飯糝 疏此以  
漢法況之

舉解注古文解皆為爵延熹中詔較書作解

禮記

曲禮乘安車注安車坐乘若今小車也 疏古者乘四  
馬之車立乘此臣既老故乘一馬小車坐乘也庾蔚  
云漢世駕一馬而坐乘也

請業則起請益則起注起若今摳衣前請也 疏漢時

受學有摳衣前請之法鄭引證之也

在醜夷不爭注四皓曰陛下之等夷

不以隱疾注俗語云隱疾難為醫

用枳注今人或謂箸為枳提

量鼓疏隱義云東海樂浪人呼容十二斛者為鼓

禮不諱嫌名釋文案漢和帝名肇不改京兆郡魏武帝

名操陳思王詩云脩阪造雲日是不諱嫌名

君天下曰天子注今漢於蠻夷稱天子於王侯稱皇帝  
量幣注今河東云幣帛也

使其羞注羞進也古者謂候為進 疏古時謂迎客為

進漢時謂迎客為候

棋注棋枳也有實今邳郟之東食之

檀弓蟻結于四隅注殷之蟻結似今蛇文畫

置翣注牆柳衣翣以布衣木如攝與 疏攝是漢時之

扇與疑辭鄭恐人不識翣體故云

覆夏屋注夏屋今之門廡也其形旁廣而卑 疏殷人  
以來始屋四阿夏家之屋唯兩下而已無四阿如漢  
之門廡

重雷注今宮中有承雷云以銅為之

漢宣帝紀金芝產函德殿銅池中注銅池承雷也  
以銅為之

衽每束一注衽今小要衽 疏漢時呼衽為小要也  
厭冠注今喪冠其服未聞

豐碑注斲大木為之形如石碑於椁前後四角樹之穿中於間為鹿盧下棺以絳繞天子六絳四碑前後各重鹿盧也 疏案春秋天子有隧以羨道下棺所以下碑者凡天子之葬掘地以為方壙漢書謂之方中桓楹注四植謂之桓 疏案說文桓亭郵表也謂亭郵之所而立表木謂之桓即今之橋旁表柱也 王制大國三卿皆命於天子注命於天子者天子選用之如今詔書除吏矣

制國用注如今度支經用

狄鞮注今冀部有言狄鞮者

史以獄成告於正注正於周鄉師之屬今漢有正平丞  
秦所置 疏案漢書百官公卿表廷尉秦官掌刑辟  
有正左右監宣帝地節三年初置左右平鄭見古有  
正連言平耳此王制多是殷法秦則放殷置之

執左道注左道若巫蠱及俗禁 疏盧云左道謂邪道

地道尊右右為貴故漢書云右賢左愚右貴左賤故

正道為右不正道為左巫蠱案漢書武帝時江克埋  
桐人於太子宮是也俗禁者若前漢張竦行辟反支  
後漢書郭躬傳有陳伯子者出辟往亡入辟歸忌是  
也

周尺注周尺之數未詳聞也案禮制周猶以十寸為尺  
蓋六國時多變亂法度或言周尺八寸則步更為八  
八六十四寸以此計之古者百畝當今百五十六畝  
二十五步古者百里當今百二十五里 疏鄭即以

古周尺十寸為尺八尺為步則步八十寸鄭又以今周尺八寸為尺八尺為步則今步皆少於古步一十六寸也是今步別剩六十寸

月令魚上冰注夏小正正月啟蟄魚陟負冰漢始亦以驚蟄為正月中 疏漢之時立春為正月節驚蟄為正月中雨水為二月節春分為二月中氣至前漢之末以雨水為正月中驚蟄為二月節故律歷志云正月立春節雨水中二月驚蟄節春分中是前漢之末

劉歆作三統歷改驚蟄為二月節鄭以舊歷正月啟  
蟄啟即驚也故云漢始亦以驚蟄為正月中但蟄蟲  
正月始驚二月大驚故在後移驚蟄為二月節雨水  
為正月中

鴻鴈來注今月令鴻皆為候 疏月令出有先後入禮  
記者為古不入禮記者為今則呂氏春秋是也

先立春三日 疏周法五時迎氣皆前期十日而齋散  
齋七日致齋三日今秦法簡省故三日也

迎春注周近郊五十里 疏鄭注尚書君陳序云天子  
近郊五十里今河南洛陽相去則然是也

草木萌動注農書曰土長冒橛陳根可拔耕者急發

疏案漢書藝文志農書有九家百一十四篇鄭所引

農書先師以為汜勝之書也漢書注成帝時為侍郎

使教田三輔也土長冒橛者謂置橛以候土

侍郎按漢書注

云議郎

始雨水注漢始以雨水為二月節 疏漢初驚蟄為止

月中雨水為二月節至後來事稍變改故律厯志云  
雨水為正月中驚蟄為二月節由氣有參差故也

省圜圜注圜圜所以禁守繫者若今別獄矣桎梏今械  
也 疏崇精問曰獄周曰圜土殷曰羑里夏曰均臺  
圜圜何代之獄焦氏答曰月令秦書則秦獄名也漢  
曰若盧魏曰司空是也

日夜分疏馬融曰晝有五十刻夜有五十刻據日出入  
為限蔡邕以為星見為夜日入後三刻日出前三刻

皆屬晝晝有五十六刻夜有四十四刻鄭康成注尚  
書云日中星以為日見之漏五十五刻不見之漏四  
十五刻與蔡較一刻也大畧亦同

大合樂注其禮亡今天子以大射郡國以鄉射禮代之  
命大尉注三王之官有司馬無大尉秦官則有大尉今  
俗人皆云周公作月令未通於古 疏俗人謂賈逵  
馬融之徒皆云月令周公所作故王肅用焉

為來歲受朔日注秦以建亥之月為歲首於是歲終使

諸侯及鄉遂之官受此法焉

命大史釁龜筮注周禮龜人上春釁龜謂建寅之月也  
秦以其歲首使大史釁龜筮與周異矣 疏秦以孟  
冬為歲首謂建亥月

大飲烝注其禮亡今天子以燕禮郡國以鄉飲酒禮代  
之

臘先祖五祀

左傳虞不臘矣正義月令孟冬臘門閭及先祖五

祀臘之見於傳記者唯月令與此二文而已秦本紀惠王十二年初臘始皇三十一年更改臘曰嘉平蔡邕獨斷云臘者歲終大祭縱吏民宴飲非迎氣故但送不迎應劭風俗通云案禮傳夏曰嘉平殷曰清祀周曰大蜡漢改曰臘臘者獵也田獵取獸祭先祖也此言虞不臘矣明當時有臘祭周時臘與大蜡各為一祭言漢改曰臘不蜡而為臘耳征鳥注題肩也齊人謂之擊征

大射儀注齊魯之間名題肩為正

曾子問公館注若今縣官宮也 疏鮑遺問曰注此云

公所為君所命使舍已者注雜記云公所為若今離  
宮別館也是二說異何張逸答曰公館若今停待者  
也離宮是也聘禮曰卿館於大夫大夫館於士公命  
人使館客亦云所為也

文王世子內豎之御者注御如今小史直日矣

春官釋奠于其先師注若漢禮有高堂生樂有制氏詩

有毛公書有伏生億可以為之也 疏皆漢書儒林  
傳文億是發語之聲

成均注董仲舒曰五帝名太學曰成均則虞庠近是也  
疏春秋繁露云成均為五帝之學

禮運蜡賓釋文夏曰清祀殷曰嘉平周曰蜡秦曰臘  
吾得夏時焉注其書存者有小正

吾得坤乾焉注其書存者有歸藏 疏先言坤者熊氏  
云殷易以坤為首故先坤後乾

宗文總目歸藏隋志有十三篇今但存初經齊母  
本著三篇

耐以天下為一家注耐古能字俗書世異古字時有存  
者則亦有今誤矣 疏案說文云耐者鬚也鬚謂廝  
下之毛象形字也古者犯罪以髡其鬚謂之耐罪故  
字從寸寸為法也不虧形體猶堪其事故謂之耐漢  
書惠帝紀中具有其事古之能字為此耐字取堪能  
之義後來乃假借鼈三足為能今書或有作耐字者

此耐以天下為一家及樂記云人不耐無樂仍作耐字是古字時有存者亦有誤不安寸直作而字則易屯象利建侯而不寧及劉向說苑能字皆為而也鄭注樂記耐古能字後世變之此獨存焉古以能為三台字兩注雖異其意同也

還相為宮注終於南呂更相為宮凡六十也 疏諸本及定本多作終於南事則是京房律法

禮器椽禁注禁如今方案隋長局足高三寸 疏案漢

禮器制度而知

隋他  
果反

門外缶門內壺君尊瓦甒注壺大一石瓦甒五斗 疏

漢禮器制度文也

或素或青注變白黑言素青者秦二世時趙高欲作亂  
或以青為黑黑為黃民言從之至今語猶存也 疏  
即鹿馬之類也

經禮三百曲禮三千注經禮謂周禮也周禮六篇周官  
有三百六十曲猶事也事禮謂今禮也禮篇多亡本

數未聞其中事儀三千 疏漢孝文帝時求得周官  
不見冬官一篇乃使博士作考工記補之

郊特牲明酌也注明酌者事酒之上也名曰明者事酒  
今之醕酒皆新成也 疏古之事酒正是漢之醕酒  
內則紛悅注紛悅拭物之巾也今齊人有言紛者

笄注笄今簪也

滌瀧注秦人澠曰滌齊人滑曰瀧

敦牟注牟讀曰整釋文齊人呼土釜為牟 疏敦則周

禮有玉敦今之杯盃也隱義曰磬土釜也今以木為  
器象土釜之形

介婦注雖有勤勞不敢掉磬 疏庾氏云齊人謂之差  
訐崔氏云北海人謂相激之事為掉磬隱義云齊人  
謂相絞訐為掉磬

三牲用藪注藪煎菜萁也漢律會稽獻焉 疏賀氏云  
今蜀郡作之九月九日取菜萁折其枝連其實廣長  
四五寸一升實可和十升膏名之藪也

魚去乙注今東海鮫魚有骨名乙在目旁狀如篆乙食之鯁人不可出

麋鹿魚為菹注今益州有鹿痿者近由比為之矣

痿於偽反

疏益州人有將鹿肉畜之痿爛謂之鹿痿

與稻米為醑注狼臙膏臙中膏也以前稻米則似今膏

饜矣此周禮醑食也

饜之然反又音贊

疏漢時膏饜以膏

煎稻米鄭舉時事以說之

玉藻措珽注相玉書曰珽玉六寸明自炤

續緼注續謂今之新綿也緼謂今續及舊絮也

而素帶終辟大夫素帶辟垂士練帶率下辟注而素帶終辟謂諸侯也諸侯不朱裏合素為之如今衣帶為之下天子也大夫亦如之率練也士以下皆禪不合而絳積如今作幪為之也

凡君召以三節注今漢使者擁節

明堂位副禕注副首飾也今之步搖是也 疏副是首飾以其覆被頭首漢之步搖亦覆首

疏屏注屏謂之樹今浮思也刻之為雲氣蟲獸如今闕  
上為之矣 疏漢時謂屏為浮思故云今浮思解者  
以為天子外屏人臣至屏俯伏思念其事案匠人注  
云城隅謂角浮思也漢時東闕浮思災以此諸文參  
之則浮思小樓也故城隅闕上皆有之然則屏上亦  
為屋以覆屏牆故稱屏曰浮思或解屏為闕也古詩  
云雙闕百餘尺則闕於兩旁不得當道與屏別也  
大路殷路也注大路木路也漢祭天乘殷之路今謂之

桑根車也

箕虛注垂五采羽於其下樹於箕之角上 疏案漢禮  
制度而知也

楊豆注齊人謂無髮為禿楊

大傳繫之以姓而弗別注繫之弗別謂若今宗室屬籍  
也 疏漢之同宗有屬籍則周家繫之以姓是也

少儀籥注籥如笛三孔 疏案漢禮器知之

學記扞格注格讀如凍洛之洛 疏今人謂地堅為洛

樂記不殯注今齊人語有殯者

治亂以相注今齊人或謂椽為相

訊疾以雅注雅亦樂器名也狀如漆管中有椎 疏以

漢時制度而知也

喪大記食粥於盛注盛謂今時杯杆也

統注統以組類為之綴之領側若今被識矣 疏領為

被頭側謂被旁識謂記識

畫翬注漢禮翬以木為筐廣三尺高二尺四寸方兩角

高衣以白布畫者畫雲氣其餘各如其象柄長五尺  
魚躍拂池注以銅為魚縣於池下 疏亦參漢之制度

而知也

大夫士以咸注今齊人謂棺束為緘繩

雜記使其實注實當為至此讀周秦之人聲之誤也

素沙注素沙若今紗縠之帛也六服皆袍制不禪以素

紗裏之如今袷袍襪重繒也 疏袍制謂通衣裳有

表有裏似袍漢時有袷袍其袍下之襪以裏繒為之

繭衣裳注若今大襦也

公館者公宮與公所為也注公所為君所作離宮別館也

有司官陳器皿注器皿其本所齋物也律弃妻卑所齋

卑必  
利反

東五兩注今謂之匹猶匹偶之云與

紉以五米注紉施諸縫中若今時條也

祭法七祀五祀注司命與厲其時不著今時民家或春

秋祠司命行神山神門戶竈在旁是必春祠司命秋祠厲也或者合而祠之山即厲也民惡言厲巫祝以厲山為之謬乎 疏漢時人民嫌惡厲巫祝之人意以厲神是厲山氏之鬼為之

七廟疏其主之制案漢儀高帝廟主九寸前方後圓圍一尺后主七寸

春秋正義衛次仲云右主八寸左主七寸廣厚三寸穿中央達四方也范甯云天子主長尺二寸諸

侯主長一尺也白虎通云納之西壁

大夫以下成羣立社曰置社注大夫不得特立社與民  
族居百家以上則共立一社今時里社是也郊特牲  
曰唯為社事單出里 郊特牲疏周法百家以上得  
立社其秦漢以來雖非大夫民二十五家以上則得  
立社故云今之里社又鄭志云月令命民社謂秦社  
也自秦以下民始得立社也

中庸栽者培之注今時人名草木之殖曰栽築牆立板

亦曰裁

壹戎衣注衣讀為殷聲之誤也齊人言殷聲如衣虞夏  
商周氏者多矣今姓有衣者殷之曹與

仁者人也注人也當讀如相人偶之人以人意相存問  
之言

緇衣其出如綸注綸今有秩嗇夫所佩也 疏案漢百

官公卿表十里一亭十亭一鄉鄉有三老有秩嗇夫

漢書云張敞以鄉有秩補太守卒史朱邑為桐鄉嗇

夫續漢百官表鄉置有秩郡所置其鄉小者縣所署  
嗇夫案此有秩嗇夫職同但隨鄉大小故名異耳名  
雖異其所佩則同張華云綸如宛轉繩

後漢仲長統傳身無半通青綸之命注十三州志  
曰有秩嗇夫得假半章印續漢輿服志曰百石青  
紺綸一米宛轉繆織長丈二尺說文綸青絲綬又  
爾雅注云綸今有秩嗇夫所帶糾青絲綸

資冬祈寒注資當為至齊魯之語聲之誤也祈之言是

也齊西偏之語也

周田觀文王之德注古文為割申勸寧王之德今博士  
讀為厥亂勸寧王之德三者皆異古文似近之

問喪鷄斯注當為笄纚今時始喪者邪巾貊頭笄纚之  
存象也

深衣續衽鉤邊注鉤邊若今曲裾也 疏鄭以後漢之  
時裳有曲裾故以續衽鉤邊似漢時曲裾今時朱衣  
朝服從後漢明帝所為則鄭云今曲裾者是今朝服

之曲裾也

爾雅裳削幅謂之縠注削殺其幅深衣之裳

曲袷如矩以應方注古者方領如今小兒衣領 疏鄭  
以漢時領皆嚮下交垂故云古者方領似今擁咽故  
云若今小兒衣領但方折之也

鄉飲酒義注謂之鄉者州黨鄉之屬也或則鄉之所居  
州黨鄉大夫親為主人焉如今郡國下令長於鄉射  
飲酒從太守相臨之禮也 疏謂郡治之下及王侯

有國治之下滿萬戶以上之令不滿萬戶之長於已  
縣或射或飲酒則從郡之太守及主國之相來自行  
禮相監臨之儀不用令長禮也令長射而飲酒似州  
長黨正也太守與相來監臨似鄉大夫監臨也

射義諸侯歲獻貢士於天子注歲獻獻國事之書及計  
偕物也 疏漢時謂郡國送文書之使謂之為計吏

其貢獻之物與計吏俱來故謂之計偕物也偕俱也  
表記衣服以移之注移讀如水汜移之移

昌氏反

移猶廣

大也

漢制攷卷三

欽定四庫全書

漢制攷卷四

宋 王應麟 撰

詩

小星抱衾與裯箋裯牀帳也 疏漢世名帳為裯蓋因  
於古鄭志今人名帳為裯

願言則噓箋今俗人噓云人道我此古之遺語也

涇以渭濁注涇渭相入而清濁異 疏漢書溝洫志云

涇水一石其泥數斗潘岳西征賦云清渭濁涇是也

方之舟之注舟船也 疏舟者古名也今名船易曰利

涉大川乘木舟虛注云舟謂集板如今自空大木為  
之曰虛即古又名曰虛總名皆曰舟

副筭六珈箋珈之言加也副既筭而加飾如今步搖上  
飾古之制有所未聞 疏步搖副之遺象故可以相  
類也古今之制不必盡同故言古之制有所未聞以  
言六珈必飾之有六但所施不可知

漸車帷裳箋帷裳童容也 疏巾車云重翟厭翟安車

皆有容蓋鄭司農云容謂檐車山東謂之裳幃或曰  
童容以幃障車之傍如裳以為容飾故或謂之幃裳  
或謂之童容其上有蓋四傍垂而下謂之檐故雜記  
曰其輶有袞注云袞謂鼈甲邊緣是也然則童容與  
檐別司農云謂檐車者以有童容上必有檐故謂之  
為檐車也

適子之館兮箋卿士所之之館在天子之宮如今之諸  
廬也

方東蘭兮注蘭蘭也

疏澤蘭廣而長節節中赤高四

五尺漢諸池苑及許昌宮中皆種之可著粉中藏衣  
著書中辟白魚

齊子豈弟箋豈讀當為闔弟古文尚書以弟為圉圉明  
也 疏古文尚書即今鄭注尚書是也無以悌為圉  
之字唯洪範稽疑論卜兆有五曰圉注云圉者色澤  
光明蓋古文作悌今文作圉賈逵以今文較之定以  
為圉故鄭以賈氏所奏從定為圉於古文則為悌

有鴉萃止疏漢供御物各隨其時唯鴉冬夏尚施之以其美故也

刺朝廷之不知 疏漢魏稱人主或云國家或言朝廷古今同也

烝然汕汕注汕汕櫟也箋櫟者今之撩罟也

錫我百朋箋古者貨貝五貝為朋 疏漢書食貨志大

貝壯貝么貝小貝不成貝為五小貝以上四種各二貝為一朋而不成者不為朋王莽多舉古事而行五

貝

搏獸于敖箋敖鄭地今近滎陽

田峻至喜箋田峻司嗇今之嗇夫也 疏田峻田官在

田司主稼穡故謂之司嗇漢世亦有此官謂之嗇夫  
故言今之嗇夫也

既種既戒箋至孟春土長冒櫛陳根可拔而事之 疏  
出於農書

邪幅在下注幅偏也箋邪偏如今行滕也偏束其脛自

足至膝故曰在下 疏左傳曰帶裳幅烏內則亦單  
云偏則此服名偏而已杜鄭皆云今之行滕然則邪  
纏於足謂之邪幅

酌言疇之箋主人既卒酢爵又酌自飲卒爵復酌進賓  
猶今俗人勸酒 疏俗人亦先自飲而後勸人

韓奕箋梁山今左馮翊夏陽西北 疏漢於長安畿內  
立三郡謂之三輔京兆在中馮翊在東扶風在西北  
郡之長謂之太守此三輔者謂之京兆尹左馮翊右

扶風左右猶外郡之名太守也計此止須言馮翊耳  
不須言左但漢書稱馮翊扶風之人皆并言左右故  
鄭亦連言左范曄後漢書始於馮翊扶風之人不言  
左右

召旻彼疏斯糗箋米之率糲十糗九鑿八侍御七 疏  
九章粟米法云粟率五十糲米三十糗二十七鑿二  
十四侍御二十一

靴磬祝圉疏臯陶謨云合止祝啟注云祝狀如漆筓中

有椎合之者投椎於其中而撞之敵狀如伏虎背上刻之所以止鼓謂之止釋樂云所以鼓祝謂之止所以鼓敵謂之甄郭璞云祝如漆笏方二尺四寸深一尺八寸中有椎柄連底洞之令左右擊止者其椎名也敵如伏虎背上有二十七鉏鋸刻以木長尺櫟之甄者其名也此等形狀蓋依漢之大予樂而知之桐篋圍敵古今字耳

簫管備舉箋簫編小竹管如今賣錫者所吹也管如篋

併而吹之 疏賣錫之人吹簫以自表也史記稱伍子胥鼓腹吹簫乞食吳市亦為自表異也

侯彊侯以箋以謂聞民今時傭賃也

以開百室箋百室者出必共洫間而耕入必共族中而居又有祭酺合醵之歡 疏族師職云春秋祭酺注云酺者為人物災害之神也古書酺為步因此祭酺聚錢飲酒故後世聽民聚飲皆謂之酺漢書每有嘉慶令民大酺五日是其事也

允猶翕河箋河自大陸之北敷為九 疏鄭志答張逸  
云鉅鹿今名廣河澤然則河從廣河之北分為九也  
禹貢兗州九河既道鄭注云九河之名徒駭太史馬  
頰覆釜胡蘇簡絜鉤盤禹津周時齊桓公塞之同為  
一今河間弓高以東至平原禹津往往有其遺處焉  
鄭以古之九河皆在兗州之界於漢乃冀州域耳  
思樂泮水箋辟雖者築土雖水之外圓如壁四方來觀  
者均也 疏辟廡之宮內有館舍外無牆院也後漢

書明帝正坐自講諸儒問難於前冠帶搢紳之人圜橋門而觀聽者蓋億萬計是由外無牆院故得圜門觀之也

犧尊將將注犧尊有沙飾也 疏春官司尊彝作獻尊鄭司農云獻讀為犧犧尊飾以翡翠象尊以象鳳凰或曰以象骨飾尊此傳言犧尊者沙羽飾與司農飾以翡翠意同則皆讀為娑傳言沙即娑之字也阮諶禮圖云犧尊飾以牛象尊飾以象於尊腹之上畫為

牛象之形王肅云將將盛美也大和中魯郡於地中  
得齊大夫子尾送女器有犧尊以犧牛為尊然則象  
尊尊為象形也王肅此言以二尊形如牛象而背上  
負尊皆讀犧為義與毛鄭義異

自彼氐羌筵氐羌夷狄國在西方者也 疏氏羌之種  
漢世仍存其居在秦隴之西

書

科斗書廢已久正義亡新使甄豐較定六書一曰古文

孔子壁內書也孔子壁內古文即蒼頡之體故鄭玄云書初出屋壁皆周時象形文字今所謂科斗書以形言之為科斗指體即周之古文若於周時秦世所有至漢猶當識之不得云無能知者

堯典正義刻漏漢初率九日增減一刻和帝時待詔霍融始請改之古時真歷遭戰國及秦而亡漢存六歷雖詳於五紀之論皆秦漢之際假託為之實不得正舜典璣衡正義璣為運轉衡為橫簫運璣使動於下以

衡望之是王者正天文之器漢世以來謂之渾天儀者是也蔡邕天文志云言天體者有三家一曰周髀二曰宣夜三曰渾天宣夜絕無師說周髀術數具在考驗天象多所違失故史官不用惟渾天近得其情今史所用候臺銅儀則其法也宣帝時耿壽昌始鑄銅為之象史官施用焉後漢張衡作靈憲以說其狀史記索隱益部耆舊傳云落下閎待詔太史於地

中轉渾天

六宗正義續漢書云安帝元初六年立六宗祠於洛陽  
城西北亥地祀比大社

金作贖刑注黃金 正義此傳黃金呂刑黃鐵皆是今  
之銅也古之贖罪者皆用銅漢時改用黃金但少其  
斤兩今與銅相敵後魏以金難得合金一兩收絹十  
匹今律復依古贖銅

程氏曰漢世以金價計贓故謂十金法重不忍相  
暴章

益稷祝敔搏拊正義祝敔之狀經典無文漢初以來學者相傳皆云祝如漆桶中有椎柄敔如伏虎背上有刻漢禮器制度及白虎通其說皆為然搏拊形如鼓以韋為之實之以糠擊之以節樂漢初相傳為然

禹貢壺口梁岐正義高祖入咸陽蕭何先收圖籍則秦焚詩書圖籍皆在孔君去漢初七八十年耳身為武帝博士必當具見圖籍其山川所在必是驗實而知壺口在冀州梁岐在雍州當時疆界為然也

既修太原注高平曰太原今以為郡名 正義即平陽

縣

島夷正義孔讀鳥為島是海中之山九章算術所云海  
島邈絕不可踐量是也

黑水正義地理志益州郡故滇王國也武帝元封二年  
始開為郡郡內有滇池縣縣有黑水祠

五子之歌六馬正義經傳之文惟此言六馬漢世此經  
不傳餘書多言駕四者春秋公羊說天子駕六毛詩

說天子至大夫皆駕四許慎案王度記云天子駕六  
鄭玄以周禮校人養馬一師四圉四馬曰乘康王之  
誥云皆布乘黃朱以為天子駕四漢世天子駕六非  
常法也

石慶為太僕御出上問車中幾馬慶以策數馬畢  
舉手曰六馬

夏社正義漢世儒者說社稷有二左傳說社祭勾龍稷  
祭柱棄惟祭人神而已

是孔之  
所用

孝經說社為土神稷

為穀神勾龍柱棄是配食者也

是鄭之所從

咸有一德七世之廟正義王肅等以受命之王是初基之王故立四廟庶子王者謂庶子之後自外繼立雖承正統之後自更別立已之高祖已下之廟猶若漢宣帝別立戾太子悼皇考廟之類也

微子今殷民乃攘竊神祇之犧牲牲用注盜天地宗廟之牲用 正義漢魏以來著律皆云敢盜郊祀宗廟之物無多少皆死為特重故也

秦誓正義漢書婁敬說高祖云武王伐紂不期而會盟  
津之上者八百諸侯偽秦誓言有此文不知其本出何  
書也武帝時董仲舒對策云書曰白魚入于王舟有  
火復于王屋流為烏周公曰復哉復哉今引其文是  
武帝之時已得之矣

牧誓羌鬃微注羌在西蜀叟鬃微在巴蜀 正義左思  
蜀都賦云三蜀之豪時來時往是蜀都分為三羌在  
其西故云西蜀叟叟者蜀夷之別名巴在蜀之東偏

漢之巴郡所治江州縣也

後漢興平元年馬騰劉範謀誅李傕益州牧劉焉遣叟兵助之是蜀夷有名叟者也

武成正義漢書律歷志引武成篇與此經不同彼是焚書之後有人偽為之漢世謂之逸書後又亡其篇

召誥攻位于洛汭注治都邑之位於洛水北今河南城也 正義漢書地理志河南郡治在洛陽縣河南城別為河南縣

成王既伐東夷注海東諸夷馭麗扶餘馭貊之屬

正義此皆於孔君之時有此名漢書有高馭麗扶餘  
韓馭即彼韓也

費誓淮夷徐戎注此戎夷帝王所羈縻統緒故錯居九  
州之內秦始皇逐出之 正義漢時內地無戎夷者  
秦始皇逐出

呂刑輸而孚注謂上其鞠劾文辭 正義漢世問罪謂  
之鞠斷獄謂之劾

善敕乃甲冑注甲鎧冑兜鍪 正義經典皆言甲冑秦  
世已來始有鎧兜鍪之文古之作甲用皮秦漢已來  
用鐵鎧鍪二字皆從金蓋用鐵為之因以作名

我惟築注攻敵壘距堙之屬 正義兵法攻城築土為  
山以闕望城內謂之距堙

畢命正義漢書律歷志云畢命豐刑曰惟十有二年六  
月庚午朏王命作策書豐刑此偽作者

罔命大僕正正義與君同車最為親近故春秋隨侯寵

少師以為車右漢書文帝愛趙同命之為御

康誥正義周官隣保以比伍相及而趙商疑而發問鄭  
答云周禮太平制此為居殷亂而言

今案康誥所云以骨肉之親得相容隱故左傳云父  
子兄弟罪不相及周禮所云據疎人相督率之法以  
相連獲罪故今之律令大功已上得相容隱以其罪  
有相及是也

鹽鐵論文學曰自首匿相坐之法立骨肉殘廢而

刑罪多

論語

服周之冕正義阮謏三禮圖漢禮器制度云冕制皆長尺六寸廣八寸天子以下皆同沈引董巴輿服志云廣七寸長尺二寸應劭漢官儀云廣七寸長八寸沈又云廣八寸長尺六寸者天子之冕廣七寸長尺二寸者諸侯之冕廣七寸長八寸者大夫之冕但古禮殘缺未知孰是司馬彪漢輿服志云孝明帝永平二

年初詔有司采周官禮記尚書之文制冕皆前圓後方朱裏玄上前垂四寸後垂三寸天子白玉珠十二旒三公諸侯青玉珠七旒卿大夫黑玉珠五旒皆有前無後此則漢法耳

傳不習乎釋文鄭注云魯讀傳為專今從古案

闕

周之本以齊古讀正凡五十事鄭本或無此注者然皇覽引魯讀六事則無者非也

寢衣孔曰今之被也

孟子

孝文欲廣遊學之路論語孝經孟子爾雅皆置博士後  
罷傳記博士獨立五經而已 劉歆曰天下衆書往

往頗出皆諸子傳說猶廣立於學官為置博士

人皆謂我毀明堂注謂泰山下明堂本周天子東巡狩  
朝諸侯之處也

太誓曰我武惟揚注太誓古尚書百二十篇之時太誓  
也今之尚書太誓篇後得以克學故不與古太誓同

諸傳記引太誓皆古太誓也

事舜於畎畝之中注孟子時尚書凡百二十篇逸書有  
舜典之敘亡失其文孟子諸所言舜事皆堯典及逸  
書所載

皆去其籍注今周禮司祿之官無其職是則諸侯皆去  
之故使不復存也

廢人在官者注食祿之等差由農夫有上中下之次亦  
有此五等若今之斗食佐史除吏也

國語

祭公謀父曰日祭注日祭祭於祖考謂上食也近漢亦然

土乃脈發注農書曰春土冒櫛陳根可拔耕者急發律所以立均出度也注均者均鍾木長七尺有弦繫之以均鍾者度鍾大小清濁也漢天子樂官有之

宗室之謀不過宗人注此宗人則上宗臣也亦用同姓若漢宗正用諸劉矣

被羽先升注羽鳥羽繫於背若今軍將負旄矣

執枹鼓立於軍門注軍門立旌為門若今牙門矣

屏攝之位注屏屏風也攝形如今要扇皆所以分別尊

卑為祭祀之位近漢亦然

左傳廵羣屏攝注祭祀之位正義鄭衆云攝束茅以

為屏蔽

盟于宋候遮扞衛不行注候候望遮遮罔也晝則候遮

夜則扞衛扞衛謂羅闔狗附也張羅闔去壘五十步

而陳周軍之前後左右彊弩注矢以誰何謂之羅闔

又二十人為曹輩去壘三百步畜犬其中或視前後或視左右謂之狗附皆昏而設明而罷候遮二十人居狗附處以視聽候望明而設昏而罷

右執殤宮注若今世云能使殤也

巴浦之犀犛兕象注今象出徼外其三獸則荆交有焉  
億醜注十萬曰億古數也今人乃以萬萬為億

追而予之璽書注古者大夫之印亦稱璽

左傳正義蔡邕獨斷云璽

印也信也天子璽白玉螭虎紐古者尊卑共之衛宏云奉以前民皆以金玉為印唯其所好自秦以來唯

天子之印獨稱璽又以玉羣臣莫敢用也

趙語夫差衣水犀之甲者億有三千注所謂賢良也若  
今備衛士

### 公羊春秋

隱元年會猶最也注最之為言聚若今聚民為投最  
如勿與而已矣注如即不如齊人語也

二年無聞焉爾注春秋其說口授相傳至漢公羊氏及  
弟子胡毋生等乃始記於竹帛故有所失也

昉於此乎注昉適也齊人語

五年登來之也注登讀言得來得來之者齊人語也齊人名求得為得來作登來者其言大而急由口授也百金之魚注百金猶百萬也古者以金重一斤若今萬錢矣

桓二年累也注齊人語也五年悵也注悵者狂也齊

人語七年焚之者何樵之也注樵之齊人語六

年化我也注行過無禮謂之化齊人語也

莊十二年注脰頸也齊人語 二十年注瘠病也齊人語也 二十八年伐者為客注伐人者為客讀伐長言之齊人語也伐者為主注見伐者為主讀伐短言之齊人語也 三十一年漱浣注無垢加功曰漱去垢曰浣齊人語也

僖元年注軻小車轅冀州以北名之云爾 十年踊為文公諱也注踊豫也齊人語若關西言渾矣 三十年詐戰注詐卒也齊人語也

文十三年往黨注黨所也所猶時齊人語也 十五年

筍將而來注筍者竹篾一名編與齊魯以北名之曰  
筍

宣六年荷畚注畚草器若今市所量穀者是也齊人謂  
之鍾

膳宰注主宰割殺犧者若今大官宰人

成二年踊于楮而窺客注凡無高下有絕加躡板曰楮  
齊人語 十五年魯人徐傷歸父之無後也注徐者

皆共之辭也關東語

襄五年往殆乎晉注殆疑讞于晉齊人語

十六年君若贅旒然注若今俗名就壻為贅壻矣

三十年更宋之所喪注如今俗名解浣衣復之為更衣

昭二十五年再拜顙注顙者猶今叩頭矣

定元年不蓑城注若今以草衣城是也

哀六年于諸其家注于諸置也齊人語也

十二年用田賦注若今漢家斂民錢以田為率矣

說文

漢律曰祠祀司命

祀卑履切以豚祠司命

漢律會稽獻鰓一斗

魚既切煎茱萸

漢令曰趣張百人

車者切距也

魔漢令鬲從瓦麻聲

漢令曰蠻夷長有罪當殊之

漢律令箠小筐也

漢律能捕豺豸購百錢

漢律會稽郡獻鮎醬三斗

蚌也巨乙切

漢律曰婦告威姑

絳籀文繒揚雄以為漢律祠宗廟丹書告

漢律民不繇貨錢二十二

漢律曰綺絲數謂之紕

治小切

布謂之總綬組謂之首

漢律曰膠田菽艸

漢律曰及其門首灑泔

漢令蠻夷卒有額

相主切絆前兩足也

漢令解衣耕謂之褻

漢律曰賜衣者縵表白裏

漢律名舩方長為舩艦

漢律齊人予妻婢姦曰姘

左傳注漢律淫  
季父之妻曰報

漢律曰見婢變不得侍祠

樂浪挈令織從糸從式

臣鉉等曰挈令  
蓋律令之書也

尉律學僮十七已上始試諷籀書九千字乃得為吏又

以八體試之郡移太史并課最者以為尚書史書或

不正輒舉劾之

徐鍇曰尉律漢律篇名

明堂月令玄鳥至之日祠于高禩 季夏燒薶 數將

儼終 舫人習水 酎三重醇酒也明堂月令曰孟

秋天子飲酎

對或從士漢文帝以為責對而為言多非誠對故去其

口以從士也

秦漢之初侍中冠駿驎冠

漢中有胸臆縣地下多此蟲因以為名

符信也漢制以竹長六寸分而相合

古者貨貝而寶龜周而有泉至秦廢貝行錢

秦以罪為臯字

秦以臯似臯字改為罪

漢今有髻長

秦謂民為黔首黑色也周謂之黎民

漢有桐馬官作馬酒

後漢長沙王始煮艸為菹

東齊壻謂之倩

今俗以始生子為鼻子

今逐疫有顛頭

祆胡神也 僧浮屠道人也 塔西域浮屠也

律厯書名五星為五步

洛陽名弩曰弮

毅改大剛卯以逐精鬼

闕二  
字 名引弓控弦

夔召公名史篇名醜  
徐鍇曰史篇所作  
蒼頡十五篇也

安定朝那有湫泉

今鹽官入水取鹽為掬

鷓鴣走鳴長尾雉也乘輿以為防鈇著馬頭上

角觶狀如豕角善為弓出胡休多國

羌人所吹角屠鬻以驚馬也 羌笛三孔

潁川人名小兒所書寫為管

古者玉琯舜之時西王母來獻其白琯前零陵文學姓

奚於伶道舜祠下得笙玉琯夫以玉作音故神人以

和鳳皇來儀也

祕書暝从戌 祕書說日月為易象陰陽也

揚雄說以為古理官決罪三日得其宜乃行之从晶从  
宜亡新以為疊从三日太盛改為三田

鬱鬯百草之華遠方鬱人所貢芳草合釀之以降神鬱  
今鬱林郡也

楸柔木也工官以為要輪

楮柱砥古用木今以石

樞龜目酒尊刻木作雲雷象

蜀人聞子雋鳴皆起云望帝

春分而未生日夏至晷景可度未有秒秋分而秒定律  
數十二秒而當一分十分而寸其以為重十二粟為  
一分十二分為一銖故諸程品皆从末

十髮為程一程為分十分為寸

布之八十縷為稷五稷為秬二秬為秠

右扶風有五時好時廊時皆黃帝時祭或曰秦文公立

也

司馬相如說淮南宋蔡舞嘯喻也

鹽河東鹽地袤五十一里廣七里周百十六里

安定有鹵縣東方謂之虜西方謂之鹵

鄆河東臨汾地即漢之所祭后土處

弘農謂羴帔也

椽南郡蠻夷賓布

幡書兒拭觚布也

今鹽官三斛為一畚

居僂反

中婦人手長八寸謂之咫周尺也

頰太史卜書頰仰字如此

顛南山四顛白首人也

龠會稽山一曰九江當龠也民以辛壬癸甲嫁娶

甘氏星經曰太白上公妻曰女媞

女媞居南斗食厲天下祭之曰明星

冬至後三戌臘祭百神

闕

皮有闕出樂浪車

闕神爵四年初捕收輸考工

媵楚俗以二月祭飲食也一曰祈穀食新曰離媵

周制天子地方千里分為百縣縣有四郡故春秋傳曰

上大夫受郡是也至秦初置三十六郡以監其縣

周景王作洛陽諺臺

凡氏切

揚雄賦響若氏隕

承音切

葺貉中女子無絉以帛為脰空用絮補核名曰縛衣狀

如檐褕

召上書者汝南許沖詣左掖門會令并齋所上書十月

十九日中黃門饒喜已詔書賜召陵公乘許沖布四十匹即日受詔朱雀掖門敕勿謝



漢制攷卷四